

## Evening Dogri News Bulletin, 27 March 2025

-इवनिंग डोगरी न्यूज़ बुलेटिन

समे .18:15 Hrs

### Headlines

1. केन्द्री मंत्री नितिन गडकरी होरें आखेआ ऐ जे 2 लक्ख करोड़ रुपें शा मते दे सिडक प्रोजेक्टें गी जम्मू-कश्मीर च अमल च आंदा जा करदा ऐ।
2. एलजी मनोज सिन्हा होरें पिच्छले बरें रियासी च होए दे आतंकवादी हमले च जान मुहाने आहले बस कंडक्टर हुंदी भैहनू गी सरकारी नौकरी दा नियुक्ति पत्तर सौंपेआ ऐ।
3. एलजी होरेंघर-घर जाइयै कूड़ा चुक्कने आहली कुल 4 गड्डिएं गी अज्ज झंडी दस्सियै रवाना करोआया।
4. बन्ने आहले जिले पुंछ ते रजौरी गी कश्मीर घाटी कन्नै जोड़ने आहली ऐतिहासिक मुगल रोड परा बर्फ हटाने दे कम्मै गी शुरु कीता गेआ ऐ।
5. कठुआ जिले च जारी टाक्करे च द'ऊं पुलसकर्मी जख्मीं। सुरक्षाबलें रजौरी जिले दे मनेयाल गली आहली जांगली इलाके च इक सांझे तपाशी अभियान दरान 5 गोलियां ते इक हत्थगोला बरामद कीता ऐ।

<><><><><><>

### Road-Infrastrucutre

शिडक, यातायात ते जरनैली शिडकें दे केंद्री मंत्री नितिन गडकरी होरें अज्ज लोकसभा च जानकारी दित्ती ऐ जे जम्मू-कश्मीर च शिडक ढांचागत आस्तै 2 लक्ख करोड़ रुपे दी परियोजनां लागू कीतियां गेदियां ना। उनें इब्बी

दस्सेआ जे जम्मू-कश्मीर च शिडक संपर्क दे सुधार आस्तै 105 सुरंगां बनी गेदियां ना। उनें जोर पाया जे जम्मू ते कश्मीर खेत्तर बश्कार 22 सुरंगें गी लेइयै कम्म होई चुके दा ऐ ते सीमा सडक संगठन-बीआरओ दे राएं 14 होर सुरंगां बनाइयां जा'रदियां ना।

<><><><><><>

## LG-Appointment Letter

लेफ्टिनेंट गवर्नर मनोज सिन्हा होरें पिच्छले ब'रे रियासी च होए दे आतंकवादी हमले च जान मुहाने आहले अर्जुन शर्मा हुंदी भैहन रेणु शर्मा होरें'गी अज्ज हमदर्दी दी बिनाहू उप्पर सरकारी नौकरी आहला नियुक्ति पत्तर भेंट कीता। अर्जुन शर्मा होर ओकड़ी बस दे कंडक्टर हे, जेह्दे पर आतंकवादिएं जंदी 9 जून 2024 गी रियासी च हमला कीता हा। एलजी होरें उं'दे परोआर गी प्रशासन दी तरफा हर मुमकन मदाद दा भरोसा दोआया ऐ।

<><><><><><>

## LG-Flag Off

लेफ्टिनेंट गवर्नर मनोज सिन्हा होरें घर-घर जाइयै कूडा चुक्कने आहली कुल 4 गड्डियां गी अज्ज झंडी दस्सियै रवाना करोआया। एहू गड्डियां आई.सी.आई.सी.आई. बैंक ते आई.सी.आई.सी.आई. फाउंडेशन आसेआ जम्मू नगर निगम गी दित्तियां गेइयां ना। एलजी होरें बैंक दी इस पैहलकदमी दी सराहना करदे होई आखेआ जे एह्दे कन्नै जम्मू नगर निगम दे इलाकें च साफ-सफाई जकीनी बनाने च मदाद मिलोग। बैंक दे इक बड्डे अधिकारी सन्दीप शर्मा होरें एलजी होरें'गी दस्सेआ जे उनें अपनी कारपोरेट समाजी जिम्मेदारी दे तैहत मुंसिपल कमेटी बसोहली गी बी ऐसी द'ऊं गड्डियां दित्तिआं ना। इस मौके उप्पर प्रशासन दे केई बड्डे ऐहलकार बी उत्थे मजूद हे।

<><><><><><>

## Mughal-Road

ऐतिहासिक मुगल रोड जेडी पुंछ ते राजौरी जिलें गी कश्मीर घाटी कन्नै जोडदी ऐ, उत्थे बर्फ गी साफ करने दा कम्मकाज शुरू होई गेदा ऐ। सीमा शडक संगठन नै इस कम्म दे चलदे 10 अप्रैल तगर इस रस्ते दी ट्रैफिक शुरू

करने दा लक्ष्य तय कीते दा ऐ। बी.आर.ओ दे अफसर कमांडिंग ओ.सी आशीष रंजन होरें इक प्रेस कांफ्रेंस च दस्सेआ जे इस बेल्लै मुगल रोड उप्पर बड़ी गै मती बर्फ इकट्टी होई दी ऐ जेदे करी उत्थे पस्सी डिग्गने ते बर्फ दे पहाड़ डिग्गने दे मते असार बने देन। एहदे बावजूद बी बीआरओ दी टीम इस शिड़क उप्पर लगातार कम्म करने गी लग्गी दी ऐ। बीआरओ दे अधिकारियें आम लोकें अग्गे अपील कीती ऐ जे ओहू शिड़क खुल्लने मगरा बी ट्रैफिक सरबन्धी निर्देशें दा पालन करन तां जे शिड़क हादसैं कोला बचेआ जाई सकै। मुगल रोड गी भारी बर्फबारी होने करी जनवरी महीने बंद कीता गेआ हा।

<><><><><><>

## CM-Greetings

मुख्यमंत्री उमर अब्दुल्ला होरें जम्मू-कश्मीर दे लोकें गी शब-ए-कदर ते जुमात उल विदा दे पवित्तर मौकें पर मुबारकबाद दित्ती ऐ। उमर होरें शब-ए-कदर ते जुमात उल विदा दे धार्मिक महत्व पर लोऽ पांदे होई सब्भनें गी इनें पवित्तर मौके दिआं ममारखां दित्तिआं। सेहत मंत्री सकीना इत्तू होरें बी जम्मू-कश्मीर दे बसनीकें गी शब-ए-कदर ते जुमात उल विदा दे पविततर मौकें पर मुबारकबाद दित्ती ऐ।

<><><><><><>

## Amit-Shah

हुर्रियत कन्नै जुडे दे द'ऊं होरनें समूहें - जेएंडके तहरीके इस्तेकलाल ते जेएंडके तहरीके इस्तेकामत नै अलगाववाद दी बत्त तज्जी दित्ती ऐ। गृह मंत्री अमित शाह होरें सोशल मीडिया दी इक पोस्ट राहें एहू जानकारी सांझी करदे होई आखेआ ऐ जे इ'नें दौनें समूहें प्रधानमंत्री नरेन्द्र मोदी हुंदे आसेआ तैयार नमें भारत च अपना विश्वास व्यक्त कीता ऐ। शाह होरें इब्बी आखेआ ऐ जे मोदी सरकार दे कार्यकाल दरान, कश्मीर च अलगाववाद हून अपने खीरी साहू लैऽ करदा ऐ ते एकता दी जित्त होआ करदी ऐ।

<><><><><><>

## World Theater Day

अज्ज वर्ल्ड थिएटर डे यानि विश्व रंगमंच ध्याड़े दे चलदे जम्मू च कई समारोह करोआए गे। इस मौके उप्पर नटरंग आसेआ अभिनव थियेटर च इक मशहूर नाटक 'कौवा चला हंस की चाल' करोआया गेआ।

तोआई, रंगयुग नै बी अपने स्टूडियो च इस मौके पर मशहूर नाटककार मोहन राकेश हुंदी मशहूर रचना 'लहरों के राजहंस' गी भावुक तरीके कन्नै पढियै इस ध्याड़े दा जश्र मनाया गेआ। मशहूर रंगमंच निर्देशक दे निर्देश च प्रस्तुत इस पाठ च पात्रें दी बारीकियें ते उन्दे संघर्षे गी खरी चाल्ली दर्शाया गेआ।



## Encounter

कठुआ जिले दे जुथाना इलाके च होआ'रदे इक टाक्करे च द'ऊं पुलसकर्मी जख्मीं होए ना। आकाशवाणी दे जम्मू संवाददाता दी रिपोर्ट मूजब, पिच्छले च'ऊं दिनें थमां सुरक्षाबलें आसेआ हीरानगर सैक्टर च आतंकवाद-रोधी इक बड्डा अभियान चलाया जा'रदा ऐ। टाक्करा अज्ज बड्डुलै उसलै होआ जिसलै सुरक्षाबलें, हीरानगर सैक्टर च जंदे ऐतवारें होए दे टाक्करे आहली थाहै थमां कोई 30 किलोमीटर दूर राजबाग दे घाटी जुथाना इलाके च आतंकवादिं गी दिक्खेआ। खीरी रिपोर्टां थ्होने तगर दौने बक्खी दा गोलीबारी जारी ही। मन्नेआ जा'रदा ऐ जे एहू आतंकवादी, जंदे ऐतवारें हीरानगर सैक्टर च होए दे इक लौहके नेहू टाक्करे दरान उत्थुआं नस्सी गेदे आतंकवादी गै ना। सुरक्षाबलें आसेआ जंदे संगारें, टाक्करे आहली थाहै दे नेड़े दा गै एम4 कारबाईन दिआं 4 मैगजीनां, 2 हत्थगोले, इक बुलेटप्रूफ जैकेट, स्लीपिंग बैग, ट्रैक सूट, जूते, खाने-पीने दा समेयान ते आईईडी बनाने दा किश समेयान बरामद कीता गेआ हा।



## Ammunition-Recovered

अज्ज राजौरी जिले दे जंगली इलाके च इक सांझे तपाशी अभियान दे चलदे पुलस ते सेना नै 5 बुलेट ते इक्क ग्रेनेड बरामद कीता। इक अधिकारी दी जानकारी मूजब राजौरी जिले दे थन्नामंडी इलाके दे मन्याल गली जंगल च इक्क तपाशी अभियान चलाया गेआ जेदे च इक ग्रेनेड, 5 जिंदा ग्रेनेड, इक्क गैस सिलेंडर, इक्क निक्का सोलर पैनल ते खाने-पीने दा किश समेयान बरामद कीता गेआ जेदे मगरा ग्रेनेड गी नकारा बनाई दित्ता गेआ।

<><><><><><>

## Zojila-Tunnel

एशिया दे सब्भनें शा लम्मी जोजिला सुरंग जेड़ी जम्मू-कश्मीर च बनारदी ऐ ओहदा कम्म तकरीबन 70 फीसदी मुक्की चुके दा ऐ। इस सुरंग गी बनाने दी परियोजना दा खर्चा 5 ज्हार 500 करोड़ रपे थमां उप्पर दा ऐ ते एह सुरंग श्रीनगर थमां लद्दाख तगर हर मौसम च संपर्क प्रदान करोग। जोजिला सुरंग परियोजना च 13 किलोमीटर शा मती लम्मी सुरंग बनाई जाग ते इस सुरंग तगर पुज्जने आस्तै 17 किलोमीटर थमां बद्द शिड़कां बनाइयां जांगन ते कुल मलाइयै इस परियोजना दे तैहत 0 किलोमीटर लम्मी शिड़क बनोग। अज्ज लोकसभा च शड़क यातायात ते जरनैली शिड़के दे केंद्री मंत्री नितिन गडकरी होरें एह जानकारी इक्क सोआलै दे परते च दित्ती।

<><><><><><>

## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। कार्यक्रम च शामिल करने लेई लोक अपने बचार ते सुझाह कल 28 तरीक तगर टोल फ्री नंबर 1800-11-7800 पर भेजी सकदे ना। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे ना। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहगा। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता

जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

## Reasi-Festival

रियासी दे एडीसी राकेश कुमार होरें औने आहले त्यौहारें, जिंदे च जमात उल विदा, ईद अल फितर ते चैत्र नराते शामिल न, उन्दी तैयारियें ते इंतजामें बारै सलाह करने आस्तै बैठक रक्खी। एडीसी होरें हर सरबंधी मैहकमे गी सुरक्षा, साफ-सफाई, बिजली ते पानी दी सप्लाई, ट्रैफिक ते चिकित्सक सुविधाएं ते होरें पर्याप्त बवस्थाएं गी सुनिश्चित करने आस्तै निर्देश दित्ते। धार्मिक स्थानें उप्पर कनून ते बवस्था गी तोड़ चाढ़ने, श्रद्धालुएं दी रमानदारी आहले ढंगै सिर आओजाई ते उनें थाहरें उप्पर साफ-सफाई उप्पर मता जोर पाया गेआ। एडीसी होरें सरबंधी अधिकारियें गी बजारें च निरीक्षण करने आस्तै बी निर्देशित कीता तां जे त्यौहारें दे चलदे दुकानदार कुसै बी चीज गी महंगा करियै नेई बेचन ते खाने आहली चीजें दी गुणवत्ता च कोई समझौता नेई कीता जा।

<><><><><><>

## Poonch-cricket

जम्मू-कश्मीर पुलस नै अज्ज पुंछ दे स्पोर्ट्स स्टेडियम च शहीद डीएसपी मंजीत सिंह हुंदी याद च क्रिकेट टूर्नामेंट दे पैहले चरण दा आयोजन कीता। अज्ज इस टूर्नामेंट दे उद्घाटन पर्व च पुंछ दे एसएसपी शफकत हुसैन हुंदे समेत होर पुलिस अधिकारी, उत्थूं दे मकामी खास परौहने ते कई सारे खडारी बी शामिल हे। पुलस अधिकारियें दा आखना ऐ जे समारोह दा मकसद शहीदें गी श्रद्धांजलि भेंट करना ते पुंछ दे युवाएं च खेडू भावना पैदा करना ऐ तां जे ओह ड्रग्स कोला दूर रौहन। इस बारै गल्ल करदे होई पुंछ दे एसएसपी शफकत हुसैन होरें आखेआ।

<><><><><><>